



王陽明集十四

別錄  
公移

廿二

特 別  
Q13  
3196  
15



陽明先生別錄卷之八

公移一

巡撫南贛等處通行各屬 共五條

其一 欽奉

敕諭通行各屬

正德十二年  
正月二十日

節該欽奉 敕諭江西福建廣東湖廣各布政司地  
方交界去處累有盜賊生發因地連各境事無統屬  
特命爾前去巡撫江西南安贛州福建汀州漳州廣  
東南雄韶州惠州潮州各府及湖廣郴州地方安撫  
軍民修理城池禁革奸弊一應地方賊情軍馬錢糧  
事宜小則徑自區畫大則奏請定奪但有盜賊生發

昭和十七年  
四月二十日  
購求

即便嚴督各該兵備守備守巡并各軍衛有司設法  
剿捕選委廉能屬官密切體訪及僉所在大戶并被  
害之家有智力人丁多方追襲量加犒賞或募知因  
之人陰為鄉導或購賊徒自相斬捕或聽脅從并亡  
命窩主人等自首免罪其軍衛有司官員中政務修  
舉者量加旌獎其有貪殘畏縮誤事者徑自拏問發  
落爾風憲大臣須廉正剛果肅清奸弊以副 朝廷  
之委任欽此欽遵照得撫屬地方界連四省山谿峻  
險林木茂深盜賊潛據其間不時出沒剽劫東追則  
西竄南捕則北奔各省巡捕等官彼此推調觀望不

肯協力追剿遂至延蔓日多當職猥以菲才濫膺重  
寄大懼職業鰥廢仰負 朝廷委託為照前項地方  
延袤廣遠未能遍歷其間綏撫之方隨時殊制攻守  
之策因地異宜若非的確詢訪難以臆見裁度為此  
仰抄捧回司着落當該官吏照依案驗內事理即行  
本司該道分巡分守兵備守備等官并所屬大小衙  
門各該官吏公同逐一會議要見即今各處城堡關  
隘有無堅完軍兵民快曾否操練某處賊方猖獗作  
何擒剿某處賊已退散作何撫緝某賊怙終必須撲  
滅某賊被誘尚可招徠何等人役堪為鄉導何等大

戶可令迫襲軍不足恃或須別募精強財不足用或可別為經畫某處或有閒田可興屯以足食某處或多浮費可節省以供軍何地須添寨堡以斷賊之往來何地堪建城邑以扼賊之要害姑息隱忍固非久安之圖會舉夾攻果得萬全之策一應足財養兵弭寇安民之術皆宜悉心計慮折衷推求山川道路之險易必須親切畫圖賊壘民居之錯雜皆可按實開注近者一月以裏遠者一月以外凡有所見備寫揭帖各另呈來以憑采擇非獨以匡當職之不逮亦將以驗各官之所存務求實用毋事虛言各該官吏俱

要守法奉公長廉遠取祛患衛民竭誠報國毋以各省而分彼此務須協力以濟艱難果有忠勇清勤績行顯著者旌勸自有常典當職不敢蔽賢其或奸貪畏縮志行卑汙者黜罰亦有明條當職亦不敢同惡深惟昧劣庶賴匡襄凡我有官各宜知悉布政司呈鎮守按察司呈巡撫巡按都司呈總兵衙門知會抄捧官吏具依准呈來

一仰江西福建廣東湖廣各都布按三司及江西守巡嶺北道福建守巡漳南道廣東守巡嶺東嶺南道湖廣守巡上湖南道并整飭郴桂等處兵備

道并仰江西守備南贛福建守備汀漳廣東守備  
南韶惠潮湖廣守備郴桂都指揮王泰等並同

其二案行各兵備官選揀民兵

正月二十六日

照得撫屬地方界連四省山谷險隘林木茂深盜賊  
所盤三居其一乘間劫掠大為民患本院繆當巡撫  
專以弭盜安民為職欽奉 敕諭一應軍馬錢糧事  
宜得以徑自區畫蒞任以來甫及旬日雖未遍歷各  
屬且就贛州一府觀之財用耗竭兵力脆寡衛所軍  
丁止存故藉府縣機快半應虛文禦寇之方百無一  
恃以此例彼餘亦可知夫以羸卒而當強寇猶驅羶

羊而攻猛虎必有所不敢矣是以每遇盜賊猖獗輒  
復會 奏請兵非調土軍即倩狼達往返之際輒已  
經年糜費所須動逾數萬逮至集兵舉事即以颯颯  
潛形曾無可剿之賊稍俟班師旋旅則又鼠狐聚黨  
復皆不軌之羣良由素不練兵倚人成事是以機宜  
屢失備禦益弛徵發無救於瘡痍供饋適增其荼毒  
羣盜習知其然愈肆無憚百姓謂莫可恃競亦從非  
夫事緩則坐縱烏合勢急廼動調狼兵一皆苟且之  
謀此豈可常之策古之善用兵者驅市人而使戰假  
閭戍以興師豈以一州八府之地遂無奮勇敢戰之

夫事豫則立人存政舉近據江西分巡嶺北道兵備副使楊璋呈將所屬各縣機快通行揀選委官統領操練即其處分當亦漸勝於前但此等機快止可護守城郭隄備關隘至於搗巢深入摧鋒陷陣恐亦未堪爲此案仰四省各兵備官於各屬弩手打手機快等項挑選驍勇絕羣膽力出衆之士每縣多或十餘人少或八九輩務求魁傑異材缺則懸賞召募大約江西福建二兵備各以五六百名爲率廣東湖廣二兵備各以四五百名爲率中間若有力能扛鼎勇敵千人者優其廩餼署爲將領召募犒賞等費皆查各

屬商稅贓罰等銀支給各縣機快除南贛兵備已行編選外餘四兵備仍於每縣原額數內揀選精壯可用者量留三分之一就委該縣能官統練專以守城防隘爲事其餘一分揀退疲弱不堪者免其着役止出工食追解該道以益召募犒賞之費所募精兵專隨各兵備官屯劄別選素有膽略屬官員分隊統押教習之方隨材異技器械之備因地異宜日逐操演聽候徵調各官常加考校以核其進止金鼓之節本院間一調遣以習其往來道途之勤資裝素具遇警即發聲東擊西舉動由已運機設伏呼吸從心如此

則各縣屯戍之兵既足以護守防截而兵備募召之士又可以應變出奇盜賊漸知所畏而革心平良益有所恃而無恐然後聲罪之義克振撫綏之仁可施弭盜之方斯惟其要本院所見如此其間尚有知慮未周措置猶缺者又在各官酌量潤色務在盡善期於可久亮愛民憂國之心既無不同則拯溺救焚之圖自不容緩案至即便舉行或有政務相妨未能一一親詣先行各屬精為選發先將召募所得姓名及措置支費銀糧陸續呈報事完之日通造文冊以憑查考

其三行十家牌法告諭各府父老子弟

初一日

本院奉 命巡撫是方惟欲翦除盜賊安養小民所恨才力短淺智慮不及雖懷愛民之心未有愛民之政父老子弟凡可以匡我之不逮苟有益於民者皆有以告我我當商度其可以次舉行今為此牌似亦煩勞爾眾中間固多詩書禮義之家吾亦豈忍以狡詐待爾良民但欲防奸革弊以保安爾良善則又不得不然父老子弟其體此意自今各家務要父慈子孝兄愛弟敬夫和婦隨長惠幼順小心以奉官法勤

謹以辦 國課恭儉以守家業謙和以處鄉里心要  
平恕毋得輕意忿爭事要含忍毋得輒興詞訟見善  
互相勸勉有惡互相懲戒務興禮讓之風以成敦厚  
之俗吾愧德政未敷而徒以言教父老子弟其勉體  
吾意毋忽

輪牌人每日仍將告諭省曉各家一番

十家牌式

某縣某坊

某人某籍

某人某籍

某人某籍
某人某籍
某人某籍
某人某籍
某人某籍
某人某籍
某人某籍
某人某籍
右甲尾某人
左甲頭某人



此牌就仰同牌十家輪日收掌每日酉牌時分持牌到各家照粉牌查審某家今夜少某人往某處幹某事某日當回某家今夜多某人是某姓名從某處來幹某事務要審問的確仍通報各家知會若事有可疑即行報官如或隱蔽事發十家同罪各家牌式

某縣某坊民戶某人

某坊都里長某下甲首軍戶則云某所總旗小旗

某下匠戶則云某里甲下某色匠客戶則云原籍

某處某里甲下某色人見作何生理當某處差役

有寄庄田在本縣某都原買某人田親徵保住人

某某若官戶則云某衙門某官下舍人舍餘

若客戶不報寫庄田在牌者日後來告有庄田皆

不准不報寫原籍里甲即係來歷不明即須查究

一男子幾丁

某某項官見任致仕在京聽選或在家省祭

某某處生員吏典

某治何生業成丁未成丁或往何處經營

某見當某差役

某有何技能或患廢疾

某

某

某

見在家幾丁 若人丁多者牌許增濶量添行格

填寫

一婦女幾口

一門面屋幾間係自己屋或典賃某人屋

一寄歇客人某人係某處人到此作何生理一名名開寫浮票寫帖客去則揭票無則

無云

其四案行各分巡道督編十家牌三月初五日

照得本院巡撫地方盜賊充斥因念禦外之策必以治內為先顧蒞事未久尚昧土俗永惟撫緝之宜惜然未有所措訪得所屬軍民之家多有規圖小利寄住來歷不明之人同為狡偽欺竊之事甚者私通峯

賊而與之傳遞消息窩藏奸宄而為之盤據夤緣盜賊不靖職此其由合就行令所屬府縣在城居民每家各置一牌備寫門戶籍貫及人丁多寡之數有無寄住暫宿之人揭於各家門首以憑官府查考仍編十家為一牌開列各戶姓名背寫本院告諭日輪一家沿門按牌審察動靜但有面目生疎之人踪跡可疑之事即行報官究理或有隱匿十家連罪如此庶居民不敢從惡而奸偽無所潛形為此仰抄案回道即行各屬府縣着落各掌印官照依頒去牌式沿街逐巷挨次編排務在一月之內了事該道亦要嚴加

督察期於着實施行毋使虛應故事仍令各將編置  
過人戶姓名造冊繳院以憑查考非但因事以別勤  
惰且將旌罰以示勸懲

其五告諭各府父老子弟

三月

告諭父老子弟今兵荒之餘困苦良甚其各休養生  
息相勉於善父慈子孝兄友弟恭夫和婦從長惠  
順勤儉以守家業謙和以處鄉里心要平恕毋懷險  
譎事貴含忍毋輕鬪爭父老子弟曾見有溫良遜讓  
卑已尊人而人不敬愛者乎曾見有凶狠貪暴利已  
侵人而人不疾怨者乎夫鬪訟之人爭利而未必得

求伸而未必能伸外見疾於官府內破敗其家業  
辱父祖下累子孫何苦而為此乎此邦之俗爭利  
鬪訟故吾言懇懇於此吾愧無德政而徒以言教父  
老其勉聽吾言各訓戒其子弟毋忽

巡撫南贛征剿漳寇始末

共九條

其一 批福建漳南道操棟民快呈

據兵備僉事胡璉呈將各縣民快操棟教習頗成看  
得事苟庇民豈吝小費功有實效何恤浮言叅據呈  
詞區畫允當仰該道依擬施行再照兵不在多惟貴  
精練事欲可久尤須簡嚴所募打手等項更宜逐一

較閱必皆技藝絕倫驍勇出衆因能別隊量材分等務使人有餘勇兵有餘資庶平居不致於冗食臨難可免於敗羣批呈繳

其二批福建漳南道攻剿盧溪等洞賊呈

據兵備僉事胡璉呈盧溪等洞賊首詹師富等勢甚猖獗備將畫圖貼說待期攻剿看得兵難遙度事貴乘時今打手民快等兵既已募集仰該道上緊密切相機剿撲惟在殲取渠魁毋致橫加平善其大舉夾攻再行詳議呈繳

其三牌行廣東福建兵備官剿捕方略

正

十二年正月  
二十二日

據福建廣東布按二司叅議等官張簡等各呈剿捕事宜已經行仰遵照案驗施行所有方略恐致泄露不欲備開案內爲此另行牌仰廣東嶺東福建汀漳等處兵備僉事顧應祥胡璉密切會同守巡紀功贊畫等官於公文至日便可揚言本院新有明文謂天氣向煖農務方新兼之山路崎嶇險林木叢翳若兩水存至漳霧驟興軍馬深入實亦非便莫若於要緊地方量留打手機兵操練隄備其餘軍馬逐漸抽回待秋收之後風氣涼冷然後三省會兵齊進或宣示遠

近或曉諭下人此聲既揚却乃大饗軍士陽若犒勞  
給嘗為散軍之狀實則感激眾心作興士氣一面亦  
將不甚緊關人馬抽放一處兩處以信其事其實所  
亦不復預遣間諜探賊虛實有間可乘即便齎檄  
枚連夜速發當此之時却須捨却身家有大害生勁  
卒當前重兵繼後伺至其地鼓噪而入仍戒當先之  
士惟在摧鋒破陣不許斬取首級後繼重兵止許另  
分五六十騎沿途枚斬其餘亦不得輒亂行次違者  
就便以軍法斬首重兵之後紀功贊畫等官各率數  
隊相繼而進嚴整行伍務令鼓噪之聲連亘不絕使

諸賊逃避山谷者聞之不得復聚若賊首不盡探其  
所如分兵速躡不得稍緩使賊復得為計已獲渠魁  
其餘解散黨與平日罪惡不大可招納者還與招納  
不得合功一槩屠戮乘勝之餘尤要振兵肅旅如初  
遇敵不得恃勝懈弛恐生他虞歸途仍將已破賊巢  
悉與掃蕩經過寨堡村落務禁標掠宜撫恤者即加  
撫恤宜處分者即與處分毋速一時之歸復遺他日  
之悔本院奉命而來專以節制四省沿邊軍職為  
務即今進兵一應機宜悉宜稟聽本院庶幾事有總  
領舉動齊一授去方略敢有故違悉以軍法論處各

官知會之後即連名開具遵依揭帖密切差人回報  
其四案行廣東福建領兵官進剿事宜 月二

二十  
二日

據福建廣東按察司等衙門備呈到院看得兩省剿  
捕事宜設施布置頗已詳備誠使諸將齊心軍士用  
命並舉夾攻已有必克之勢但事于各省舉動難一  
頓兵既久變故旋生則謀筭機宜旬日頓異亦難各  
守初議執為定說照得福建軍務整緝既久兼有海  
滄浦城政和諸處打手足可濟事諸將咸有以功贖  
罪之心意氣頗銳當道亦皆協謀并力期收克捷之

南陽老

收 雖強卒  
以有石  
以用交  
以用交  
以用交  
以用交

功利在速戰若當集謀之始掩賊不備奮擊而前成  
功可必今既曠日持久聲勢彰聞各巢賊黨必皆連  
絡糾合阻阱設械以禦我師其為奸計當亦日加險  
密至於今日已為持久之師且宜示以寬解待間而  
發而猶執其乘機之說張皇於外以堅賊志是謂知  
吾卒之可擊而不知敵之未可擊也廣東之兵集謀  
稍緩聲威未震意在倚重狼達土軍然後舉事利於  
持久是亦慎重周悉之謀諸賊聞之雖相結聚尚候  
土兵之集以小戰期其備必猶懈弛若因而形之以  
緩乘此機候正可奮怯為勇變弱為強而猶執其持

如  
之  
謂  
軍

重之說必候土軍之至以坐失事機是徒知吾卒之  
未可擊而不知敵之正可擊也善用兵者因形而借  
勝於敵故其戰勝不復而應形於無窮勝負之筭間  
不容髮烏可執滯除江西南贛地方凡通賊關隘已  
行兵備副使楊璋委官隄備截殺及將進剿方略各  
另差人封付福建僉事胡璉廣東僉事顧應祥會同  
守巡等官密切遵依行事外仰抄案回司即行各官  
務要同心協德乘間而動毋得各守一見糜軍債事  
一應進止不必呈稟以致誤事領軍等官隨機應變  
就便施行一面呈報如復被以此偏執失誤軍機定行

從重叅拏決不輕貸其軍馬錢糧紀功給賞等項已  
行有成規不再更定事完之日通行造冊繳報守巡  
兵備等官總具遵依進剿方略揭帖密切差人齎報  
仍呈各總鎮撫按衙門知會

其五案行福建漳南道守巡等官戴罪督兵

剿賊 二月二十日

據福建漳南道右叅政艾洪等呈准左叅政陳策副  
使唐澤手本該三司遵依議委各職隨軍紀功運謀  
經略依蒙前請南靖縣小溪中營任扎查理軍情審  
驗功次大約賊衆以四分爲率一分就擒一分聽撫

俱已審驗查處明白一分遠遁廣東境界一分深藏  
本處山谷狼子野心絕巖峻嶺易以計破難以兵碎  
必須通將調募見在官軍二萬二千餘名再加議處  
減冗兵以省費留精兵以守險待賊饑疲隨加撫剿  
庶幾軍餉不缺農業不廢節據各哨委官連日稟報  
各賊恃居險阻公然拒敵官軍不聽招撫合無繼處  
本省錢糧以堅自守之謀催請廣東狼兵以助夾攻  
之計等因隨據叅政陳策等呈據鎮海衛指揮高偉  
呈指揮覃桓縣丞紀鏞被大傘賊衆突出馬陷深泥  
被傷身死等因到院簿查先據叅政陳策等呈已經

批各官酌量事機公同會議如是賊雖據險而守尚  
可出其不趨掩其不備則用鄧艾破蜀之策從間道  
以出奇若果賊已盤據得地可以計困難以兵克則  
用充國破羌之謀減冗兵以省費務在防隱禍於顯  
利之中絕深奸於意料之外萬全無失僉謀皆同然  
後呈來定奪去後今據前因叅照指揮高偉既奉差  
委督哨自合與覃桓等相度機宜協謀並進却乃孤  
軍輕率中賊奸計雖稱督兵救援先亦頗有斬獲終  
是功微罪大難以贖準廣東通判陳策指揮黃春千  
百戶陳洪鄭芳等既與覃桓等面議夾攻眼見摧敗



略不應援挫損軍威壞事匪細俱屬違法各該領兵  
守備兵備守巡等官督提欠嚴亦屬有違合就通行  
叅究但在緊急用人之際姑且記罪查勘督剿及照  
添調狼兵一節案查該省節呈兵糧預備已久惟俟  
剋日進攻今始成軍而出一遇小挫輒求濟師况動  
調狼兵往返數月非但臨渴掘井緩不及事兼據見  
在官兵二千有餘數已不少兵貴善用豈在徒多况  
稱糧餉缺乏正宜減兵省費安可益軍匱財除廣東  
坐視官員及應否動調狼兵另行查議外仰抄案回  
道查勘指揮覃桓縣丞紀鏞是否領兵夾攻被傷身

死各官原領軍兵若干見在若干其指揮仲欽推官  
胡寧道知事曾瑤知縣施祥等緣何不行策應是否  
畏避退縮俱要備查明白從實開報其覃桓等所統  
軍兵就仰高偉管領戴罪殺賊立功自贖仍仰福建  
布政司作急查處堪以動支銀兩就呈鎮巡衙門知  
會差官領解軍前接濟一面備數呈來以憑查考不  
許稽遲致悞軍機各該官員俱要奮勇協心乘機進  
剿毋頓兵遙制以失機宜毋坐待狼兵以自懈弛務  
須連營掎角以壯我軍之威更休迭出以蓄我軍之  
銳多方以誤賊人之謀分攻以疲賊人之守掃蕩巢

穴靖安地方則東隅可收於桑榆大捷不計其小挫事完之日通查功罪呈來以憑酌量奏施行

其六案行福建廣東守巡漳南嶺東道領兵

官搜剿餘賊

三月十六日

據福建左叅政陳策副使唐澤會案呈准漳南道叅政艾洪僉事胡璉手本督據委官指揮徐麒等呈稱督領軍兵粘踪追賊至象湖山賊寨連營拒守遵奉本院密諭言犒衆退兵俟秋再舉密坊部勒諸軍乘懈奮擊云云除將擒斬功次審驗監候梟掛外呈乞照詳等因到院卷查先准兵部咨前事已經備行

福建廣東二省漳南嶺東二道守巡兵備守備等官欽遵調兵上緊相機剿撫并將進兵方略行仰各官密切遵照施行敢有故違悉以軍法論處去後續據福建布按二司守巡漳南道右叅政等官艾洪等呈據委指揮高偉呈稱督同指揮等官覃桓等領兵剋期夾攻不意大賊衆突出陷入深泥被傷身死廣東官兵在彼坐視不行策救呈詳到院叅看得各官頓兵日久老師費財致此敗衄顯是不奉節制故違方略正行查勘叅提間隨據廣東按察司等衙門僉事顧應祥等官會呈前事開稱約會福建官兵剋期進

攻間爪探福建官軍被大傘賊徒殺死指揮覃桓等情各職隨即統兵策應當獲賊人一名審係賊首羅聖欽執稱餘賊潛入箭灌巢內率領兵直抵地名白土村遇賊交戰斬獲賊級俘獲賊屬等因呈報前來看得象湖箭灌最爲峻絕諸巢賊首悉遁其間賊之精悍盡聚於此自來兵力所不能攻今各官雖有前挫隨能密遵方略奮勇協力竟破難克之寨以收桑榆之功計其大捷足蓋小挫但象湖雖破而可塘猶存賊首頗已就擒而餘猾尚多逃遁若不乘此機會速行剿撲雜草存根恐復滋蔓狡兔入穴獲之益難

除將功次另行查奏外爲此仰抄案回道查照先行方略乘此勝鋒急攻可塘破竹之勢不可復緩仍一面分兵搜斬餘猾毋令復聚爲奸罪惡未稔可招納者還與招納毋縱貪功一槩屠戮務收一篲之功勿爲九仞之棄本院即日自汀州起程前來各營督戰仍與各官備歷已破諸賊巢壘共議經久之策抄案官吏具不違依准呈來

其七獎勵福建守巡漳南道廣東守巡嶺東

道領兵官

三月二十九日

據福建叅政陳策艾洪副使唐澤僉事胡璉都指揮

僉事李胤廣東叅議張簡僉事顧應祥都指揮僉事  
 楊懋各呈稱據委官知府通判等官鍾湘徐璣等率  
 領軍兵夾攻象湖可塘箭灌大傘等處賊巢前後擒  
 斬首賊詹師富羅宗旺等共計一千五百餘名顆及  
 俘獲賊屬牛馬器械等數到院看得象湖箭灌諸寨  
 皆係極險最深賊巢自來官兵所不能下今各官乃  
 能運謀設策協力夾攻旬月之間擒斬賊首掃蕩巢  
 穴謀勇顯著功勞可嘉除將功次查奏外通合先行  
 獎勵為此牌仰汀州府上杭縣即便動支商稅銀兩  
 買辦綵段銀花羊酒委官分投領齎備用鼓樂迎送  
 各官處用旌勤勞以明獎勵之典其餘領哨有功官  
 員知府鍾湘等就行該道照依定去賞格酌量輕重  
 徑自支給官錢買辦花紅等項一體賞勞仍具由回  
 報以憑查考

計開

一等綵段二疋	價六兩	銀花二枝	價一兩	羊酒二
付價一兩				
二等綵段二疋	價四兩	銀花二枝	價八錢	羊酒三
付價八錢				
三等綵段一疋	價二兩五錢	銀花一枝	價五錢	羊酒一

付錢五

牌仰汀州府上杭縣

其八告諭新民

四月初二日

爾等各安生理父老教訓子弟頭目人等撫緝下人俱要勤爾農業守爾門戶愛爾身命保爾室家孝順爾父母撫養爾子孫無有為善而不蒙福無有為惡而不受殃毋以衆暴寡毋以強凌弱爾等務興禮義之習永為良善之民子弟羣小中或有不遵教誨出外生事為非者父老頭目即與執送官府明正典刑一則彰明爾等為善去惡之誠一則剪除莠莠免致延蔓貽累爾等良善吾今奉命巡撫是方惟欲爾

仁者

惜以發人

等小民安居樂業共享太平所恨才識短淺雖懷愛民之心未有愛民之政近因督征象湖可塘諸處賊巢悉已擒斬掃蕩住軍於此當茲春耕甚欲親至爾等所居鄉村面問疾苦又恐跟隨人衆或致勞擾爾民特遣官耆諭告及以布疋頒賜父老頭目人等見吾勤勤撫恤之心餘人衆多不能遍及各宜體悉此意

其九欽奉

敕諭切責失機官員通行各屬

照得本院於本年六月十五日節該欽奉 敕近該巡按福建監察御史程昌奏今年正月內被漳州南

靖地方流賊殺死領軍指揮覃桓縣丞紀鏞射死軍人打手一十五名叅稱指揮高偉叅政陳策艾洪副使唐澤僉事胡璉都指揮李胤失機誤事俱各有罪及稱爾膺茲重寄責亦難辭等因下兵部議謂前項賊情自去年七月已 敕彼處撫巡等官相機撫剿日久未見成功今反墮賊計喪師失事欲將高偉陳策等姑免提問各令住俸戴罪殺賊并降 敕切責令爾立效贖罪朕皆從之 敕至爾宜親詣潮漳二府地方申嚴號令詳審機宜督同守巡領軍等官調集官軍民快打手人役僭運糧餉指授方略隨賊向

往設法剿捕其福建廣東江西官員悉聽爾節制有急督令互相策應約會夾攻不許自分彼此執拘誤事如有不用命及遲誤供軍者宜照原奉 敕內事理徑自拏問施行事有應與兩廣并江西巡撫等官議處者公同計議而行務要處置得宜賊徒殄滅以靖地方欽此欽遵外照得本院於本年正月十六日抵贛蒞事常據福建叅政陳策僉事胡璉等呈為急報賊情事已經密具方略行各官遵照約會廣東官兵剋期夾攻隨據各官呈稱指揮覃桓縣丞紀鏞在廣東大傘地方遇賊突出抵戰身死又稱象湖可塘

等寨係極高絕險自來官兵所不能攻乞添調狼兵  
俟秋再舉等因到院叅看各官頓兵不進致此敗衄  
顯是不奉節制故違方略正宜協憤同奮因敗求勝  
豈可輒自退阻倚調狼兵坐失機會本院即於當日  
選兵二千自贛起程進屯汀州一面督令各官密照  
方略火速進剿立功自贖一面查勘失事緣由另行  
叅 奏間隨據各官續呈遵奉本院紙牌密諭佯言  
犒衆班師乘賊怠弛銜枚直搗攻破象湖等寨又經  
行令各官乘此勝鋒速攻可塘破竹之勢不可復緩  
仍一面分兵搜擒餘猾毋令復聚爲奸本院亦自汀

州進軍上杭期至賊寨親自督戰隨據各官復呈爲  
捷音事開稱攻破巢穴三十餘處擒斬首從賊人一  
千四百二十餘名顆俘獲賊屬五百七十餘名口燒  
燬房屋二千餘間奪獲牛馬賊仗無筭即今餘黨悉  
願聽撫出給告示招撫得脅從賊人一千二百三十  
五名家口二千八百二十八名口乞要班師等因已  
經具本奏報去後今奉 敕諭切責不勝惶恐待罪  
然猶幸其因人成事偶獲收功愧雖難當罪或可免  
隨又訪得各賊徒黨尚多逃遁諸巢餘孽又復萌芽  
果爾則憂患方興罪累日重深思其故恐是各官急

於成功不能掃蕩或是憚於久役為此隱瞞本院聞此實切慚懼即欲遵奉 敕諭事理親至漳州體勘查處但今南贛盜賊猖獗方奉 欽依夾剿師期緊迫軍馬錢糧必須調度勢難遠出又前項事情出於傳聞未委虛的合行查勘為此仰抄捧回司照依備奉 敕諭及查照先今案驗內事理即委本司公正堂上官一員會同守巡該道官親詣漳州地方督同知府等官將已破賊巢逐一查勘前項強賊曾否盡絕所獲賊首是否真正徒黨有無逃遁餘孽有無萌芽是否各官苟且隱瞞惟復別賊各另生發若賊首果已擒獲巢穴果已掃蕩是實取具各官不致遺患重甘結狀具由呈來如或有所規避欺蔽俱要明白聲說以憑叅究施行若有脫漏殘黨或是別項流賊乘間嘯聚事出意外亦要從實開報就將防剿機宜作急議處停當相機行事一面呈來定奪無得畏難推咎以致貽患地方 國典具存取罪愈大俱無違錯遲延

巡撫南贛征剿橫水桶岡等巢賊始末

共四十四條

是年九月奉 勅提督軍務

其一案行江西兵備分巡嶺北道兵符節制



正德十二年  
五月初五日

先據該道具呈計處武備以便經久事議將原選聽  
調人役如寧都殺手廖仲器之屬盡行查出頂補各  
縣選退機兵通拘贛城操演以備征調已經批仰施  
行去後看得習戰之方莫要於行伍治衆之法莫先  
於分數所據各兵既集部曲行伍合先預定爲此仰  
抄案回道照依定去分數將調集各兵每二十五人  
編爲一伍伍有小甲五十人爲一隊隊有長協哨二  
人四百人爲一營營有官有叅謀二人一千二百人  
爲一陣陣有偏將一千四百人爲一軍軍有副將偏

將無定員臨事而設小甲於各伍之中選材力優者  
爲之總甲於小甲之中選材力優者爲之哨長於千  
百戶義官之中選材識優者爲之副將得以罰偏將  
偏將得以罰營官營官得以罰哨長哨長得以罰總  
甲總甲得以罰小甲小甲得以罰伍衆務使上下相  
維大小相承如身之使臂臂之使指自然舉動齊一  
治衆如寡庶幾有制之兵矣編選既定仍每五人給  
一牌備列同伍二十五人姓名使之連絡習熟謂之  
伍符每隊各置兩牌編立字號一付總甲一藏本院  
謂之隊符每哨各置兩牌編立字號一付哨長一藏

本院謂之哨符每營各置兩牌編立字號一付營官一藏本院謂之營符凡遇征調發符比號而行以防奸偽其諸緝養訓練之方旗鼓進退之節皆要逐一講求務濟實用以收成績事完備造花名手冊送院以憑查考發遣

其二案行江西嶺北道預整操練

五月十一日

案照先經批仰將聽調人役查拘操演以備征調即今兵威士氣已覺漸有可觀但各色人內尚有遺才亦合通拘操演看得龍南等縣捕盜老人葉秀芳黃啓濟等部下兵衆亦多經戰陣况各役向化日久皆有竭忠報効之心但其勇力雖有而節制未諳向慕雖誠而情意未洽一時調用亦恐兵違將意將拂士情信誼既未交孚心志豈能齊一爲此仰抄案回道通將所屬向化義民人等如葉秀芳黃啓濟梅南春王受謝鉞之屬悉行查出照依先行定去分數行令各選部下驍勇之士多者二三百人少者一百人或五十人順從其便分定班次各役若無別故自行統領或有事故相妨許令推選親屬爲衆所服者代領前來贛城皆於教場內操演除耕種之月放令歸農其於農隙俱要輪班上操仍於教場起蓋營房使各

有棲息之地人給口糧使皆無供饋之勞効有功勤者厚加犒賞違犯約束者時與懲戒如此則號令素習自然如身臂手指之便恩義素行自然與父兄子弟之愛居則有禮動則有威以是征誅將無不可矣

其三牌行湖廣郴桂兵備道選募將領

初二日

看得所屬地方盜賊充斥一應撫剿事宜各該兵備等官既以地方責任勢難頻來面議若專以公文往來非惟事情不能該悉兼恐機宜多致瀉漏為此牌仰郴州兵備道即於所屬軍衛有司官或義官耆老推選素有膽略才堪將領熟知賊寨險夷備曉盜情向昔忠慎周密可相信任者一二人前來軍門凡遇地方機務即與密切商度往來計議庶幾事可周悉機無疎虞

其四批留嶺北道楊璋給由呈

六月初九日

據副使楊璋呈給由事看得朝廷設官本因保障臣子盡職匪專給由副使楊璋才力精敏識見練達久在軍中習知戎務凡今盜賊猖熾方爾請兵會剿一應軍馬錢糧皆倚贊畫方有次第若因給由遽爾輕動更代之人豈免事多生疎交承之際必至弊乘

間隙遂有出柙之虞何益噬臍之悔仰本官勿以循  
例給由為急惟以効忠盡職為先益展謀猷仍舊供  
職地方安靖足申體國之勤懋績彰聞豈俟天曹  
之考仍行撫按衙門知會呈繳

其五批南安府請兵協剿呈

六月初十日

據知府季敷呈各巢賊黨衆多本府兵力寡弱乞添  
兵協剿該嶺北道議將南康二班賴養介兵撥補縣  
丞舒富與國謝庄兵零都張英才兵撥補馮廷瑞統  
領其本府仍用添兵一營策應及行該府起立軍營  
二處聽候官兵到彼安插其南康上猶二縣俱該一

體起立回報看得賴養介謝庄張英才所統准令與  
峰山雙秀等兵更補預建營房議尤適當即行該府  
照議施行務要地勢雄壯溝塹深高雖係一時之謀  
亦為可久之計及看得南安上猶所聚兵衆每處不  
下二千防遏剿襲略已足用各官猶以兵少為辭不  
能運謀出奇亦已可見今可行令各官分部原領各  
兵一意防遏另調坎字營一千二百人令指揮來春  
統領往屯南安又調良字營一千二百人令指揮姚  
璽統領往屯上猶二營人馬專以相機剿襲為事聲  
東擊西務使踪跡靡定條聚復散每令變態無常該

道即將調去各兵查口糧二十四日巳時起營前去  
仍行該府縣官務要協力同心相為犄角之勢共成  
夾剿之功呈繳

其六批江西嶺北道防遏各巢事宜呈 六

二十  
六日

據兵備副使楊璋呈稱訪得前項賊徒俱被逃往橫  
水桶岡大巢屯聚所平巢穴未免復來營結合行知  
府李敷統領巽字營兵一千二百名防遏大庾縣賊  
巢縣丞舒富仍統震字營兵一千二百名防遏上猶  
南昌二縣賊巢看得各巢賊黨雖已潰散計其勢窮

食絕必將復出剽虜所議防遏事理即便照議施行  
仍行縣丞舒富務要在於賊巢總會處所屯劄多遣  
乖覺鄉導分路爪緝探知賊徒將出即便設伏擒剿  
務竭忠誠以副委任毋得虛文粉飾此後但有推奸  
坐視定行治以軍法再照前項賊徒今皆聚於橫水  
桶岡若遣重兵直搗其地示以必攻之勢彼將團結  
自守不暇勢必不敢分衆出掠不過旬餘兩巢之賊  
可以坐取仍仰該道密議直搗方略呈來定奪呈繳

其七獎勵副使楊璋等 七月初  
一日

據副使楊璋呈據知府李敷等依奉本院方略攻破

禾沙石路坑等巢一十九處擒斬首從賊人陳曰能  
鍾明貴唐洪等及殺死燒死賊徒俘獲賊屬奪獲馬  
牛騾羊器械等項爲照各賊肆毒無厭名號不軌若  
使其奸謀得以乘虛入廣其爲患害何可勝言副使  
楊璋乃能先事運謀出衆設策督發官兵潛行剿襲  
一夕之間攻破巢穴擒斬賊徒數多撲燎原之火於  
方然障潰岸之波於已決賊謀遂阻地方復寧計績  
論功良亦不小除將功次另行查奏外爲此仰贛州  
府官吏即便支給商稅銀兩買辦綵段二疋銀花二  
枝羊酒各一事就仰委本府掌印官備用綵亭鼓樂

迎送本官處用旌剿襲之功以明獎勵之典其南安  
府知府季敷親領兵衆徑入巢賊比與各官功勞尤  
著就仰該道動支商稅買辦花紅羊酒差人一體賞  
勞仍將支過買辦數目差過官員職名具由回報

其八勞賞知府季敷指揮馮翔

七月初四日

據嶺北道副使楊璋呈將督管知府季敷指揮馮翔  
等擒斬功次賞格開報到院爲照各官運謀設策屢  
挫賊鋒各營將士俱能用命効力奮勇擒斬論績計  
庸相應勞賞以勵功能爲此牌仰本府官吏即將發  
去賞功銀兩及銀牌羊酒遵照後開等第照名給賞

其陣亡射傷兵夫亦各依數查給優恤各官務要益竭忠貞協謀并勇大作三軍之氣共收萬全之功仍將給賞優恤過姓名數目具由回報以憑查考

其九批廣東嶺南道調用徭人呈

七月二十七日

據兵備僉事王大用呈稱賊首龐政深等積年稔惡叛服無常徭官徐壁等自願統領新民及委百戶麥貴等督同併力擒捕看得該道兵快悉已調征選募驍勇又皆未集賊勢復爾猖狂據理豈宜坐視照得所屬向化徭人既已革心當能効力若使統馭得宜亦與官兵何異仰該道即將向化徭民悉行查出選

委膽略諳曉徭情屬官起集分統量加犒賞使知激勵仍行稍發機兵遙為聲勢指授方略相機剿捕雖固一時權宜或亦可以濟事但事變無常兵難遙度該道自宜酌量緩急須要措置得宜以靖地方其選募驍勇一面上緊整理務在速成以濟實用呈繳

其十批廣東嶺南道地理兵糧呈

七月二十八日

據兵備僉事王大用呈繳韶州府查過應剿應截賊巢及堪支錢糧合用兵夫等項并南雄府畫圖貼說呈詳看得韶州府知府姚鵬所具賊巢地理兵糧事宜皆有條理頗得機要足見本官平日既肯用心臨

事又能縝密仰該道卽行本官悉照所議一面整飭  
齊備候三府會議至日刻期行事其南雄府不見開  
有賊巢要路及兵糧事理亦欠分曉該道仍要再與  
區畫停當并將商稅銀兩盡與查筭明白併呈繳

其十一案行預委江西吉安府九江府福建

汀州府廣東惠州府程鄉縣等官領兵聽調

八月十五日

准兵部咨該巡撫湖廣都御史秦題云云案照前事  
已經開陳兩端具本上請去後今准前因除南贛二  
府兵糧事宜另行外所據領兵等官俱在得人必須

先委訪得九江府知府汪穎吉安府知府伍文定汀  
州府知府唐淳惠州府知府陳祥俱各久習軍旅器  
度深沉才識練達程鄉縣知縣張戩近往大傘等處  
獨統率新民奮勇當先功勞尤著撫州府東鄉縣知  
縣黃堂建昌府新城縣知縣黃文鸞袁州府萍鄉縣  
知縣高桂吉安府龍泉縣知縣陳允諧素有才名堪  
以領兵但事干各府各官之中或有違抗推託臨期  
必致誤事除具本題請但有不遵約束許以軍法從  
事外合就通行知會爲此仰抄案回府卽行本官密  
切整備衣裝聽候 命下另有公文至日即便不分



星夜兼程前赴軍門以憑調用施行

其十二批廣東韶州府留兵防守申 八月

八

據韶州府申稱欲將樂昌等縣原編民壯遵奉明文量留三分之一其一分減退追銀召募未免愈加缺人防守看得本院募兵選士欲弭盜安民正恐地利不能齊一措置或有未周故期各官酌量潤色務求盡善可久今據該府各縣所呈非惟不能弭盜而適以啓盜非徒不能安民而又以擾民此豈本院立法之初意哉除行兵備僉事王大用備歷所屬親行編

選外仰韶州府知府姚鵬卽行所屬各縣掌印官務體本院立法不得已之意各要酌量事勢通融審處苟無不盡之心自無難處之事兵法謂守則不足攻則有餘今各縣所留之兵止於防守而兵備所選之士將以剿襲防守之兵雖老弱皆可以備數而張威剿襲之士非精銳不可以摧鋒而陷陣况各縣所留尚有三分之二而兵備所取止得三分之一其於大勢未便虧損今取三分之一而遂以爲地方不復可守假使原數止此亦將別無措置之方耶又况剿襲之兵旣集則兵威日振聲東擊西倏來忽往賊將瞻

前顧後自然不敢輕出各縣防守愈易爲力此於事  
理亦皆明白易見各官類皆狃於因循憚於振作惟  
知取私便之爲利而不知妨大計之爲害宜各除去  
偏小之見共爲公溥之謀若復推調遲延夾攻在邇  
已經 奏有成命苟誤軍機定以軍法從事申繳

其十三咨報湖廣巡撫右副都御史秦發兵

把截防賊奔竄

八月

准巡撫湖廣都御史秦 咨云云已經備行江西廣  
東湖廣三省該道兵備守巡等官一體欽遵施行續  
據江西嶺北道副使楊璋看得朱廣寨等處係桂陽

樂昌縣界內賊奔要路今夾攻在邇要行各道預發  
精兵把截又經備行廣東湖廣各官起集驍勇機快  
父子鄉兵人等選委素有能幹官員統領各於賊行  
要路晝夜嚴加把截或遇前賊奔逃就便詳察險易  
相機截捕或先於朱廣魚王賊所潛逃諸山寨多張  
疑兵使賊不敢奔往務要慮出萬全不得墮賊奸計  
各道仍須多差垂覺人役分投瓜探出奇設伏先事  
預防但得賊中虛實差人飛報軍門知會及仰嶺北  
道亦要備督所屬四路防遏時加申嚴大抵防寇如  
水四面隄防旣固但有一處滲漏必致併力潰決賊

所奔逃尚恐不止前項諸處仍行各道再加詢訪但有罅隙即便行文知會互相關防必使皆無蟻穴之漏度可全收草薶之功今准前因為照前項各賊屢經夾攻狡猾有素今聞大舉預將妻子搬寄此亦勢所必有照得咨開龔福全李斌皆以搬送妻子近往桶岡親識人家除行嶺北道密行擒拏一面行文湖廣各官將前項窩戶姓名密切知會或住近桂陽或住近上猶就仰各該守把官兵相機剿捕外擬合咨報為此合咨貴院煩為查照施行

其十四欽奉

敕諭提督軍務新

命通行

各屬 九月

正德十二年九月十一日節該欽奉 敕諭江西南安贛州地方與福建汀漳二府廣東南韶潮惠四府及湖廣郴州桂陽縣壤地相接山嶺相連其間盜賊不時生發東追則西竄南捕則北奔蓋因地分各省事無統屬彼此推調難為處置先年以此之故嘗設有都御史一員巡撫前項地方就令督剿盜賊但責任不專類多因循苟且不能申明賞罰以勵人心致令盜賊滋多地方受禍今因爾所奏及該部覆奏事理特改命爾提督軍務常在贛州或汀州住札仍往

前各處撫安軍民修理城池禁革奸弊一應軍馬錢糧事宜俱聽便宜區畫以足軍餉但有盜賊生發即便嚴督各該兵備守備守巡并各軍衛有司設法調兵剿殺不許踵襲舊弊招撫蒙蔽重為民患其管領兵快人等官員不拘文職武職若在軍前違期并逗遛退縮者俱聽以軍法從事生擒盜賊鞫問明白亦聽就行斬首示衆斬獲賊級行令各該兵備守巡官即時紀驗明白備行江西按察司造冊奏繳查照南方剿殺蠻賊事例陞賞激勸仍要選委廉能官員密切體訪或僉所在大戶并被害之家及素有智力人丁多方追襲量加糧賞或募知因之人陰為鄉導或購令賊徒自相斬捕或許令脅從并亡命窩主人等自行出首免罪皆聽爾隨宜處置不必執定一說其應捕人員尤要嚴加戒約不許妄拏平人及容賊挾讐攀引因而嚇詐財物擾害良善軍衛有司官員中政務修舉者量加獎勸其有貪殘畏縮誤事者文職五品以下武職三品以下徑自拏問發落事有應與各該鎮巡官計議者亦須計議而行爾為風憲大臣受茲新命尤宜廉能剛果肅清積弊以副朝廷委任之意如違責亦有所歸焉爾其欽承之毋忽故敕

欽此欽遵擬合通行爲此仰抄捧回司照依案驗備  
奉 敕諭內事理并行該道守巡兵備守備等官及  
府衛等官及府衛所縣大小衙門一體欽遵施行都  
司呈鎮守布政司呈巡撫按察司呈巡按衙門各查  
照施行

其十五案委江西分巡嶺北道紀錄功次

九月十日

節該欽奉 敕諭生擒盜賊鞫問明白就行斬首示  
衆斬獲賊級行令各該兵備守巡官即時紀驗明白  
備行江西按察司造冊奏繳查照陞賞激勸欽此欽

遵查得先准兵部咨內開湖廣廣東江西三省起調  
官軍兵快夾剿榔桂上猶等處輦賊已該本院備將  
南贛二府兵糧事宜及合用本省巡按御史紀功等  
項緣由具奏去後今照進兵在邇各賊四散出掠官  
兵擒斬已有陸續解到功次所據紀錄官員若候  
命下前往未免緩不及事爲此仰抄案回道照依案  
驗備奉 敕諭內事理行委兵備副使楊璋不妨本  
等職事照舊軍前贊畫庶務將陸續解到功次一面  
紀錄仍呈巡按衙門查照本院具題事理前往紀錄  
施行

其十六咨報湖廣巡撫右副都御史秦分兵  
守把龍泉隘口

十月

准巡撫湖廣都御史秦云云看得龍泉一縣與上猶  
縣諸巢接境將來三省夾攻使龍泉所守不固則吉  
安屬縣俱被騷擾必須大兵一哨就從此路進剿方  
可止賊奔衝已行言安府知府伍文定備行所屬龍  
泉萬安太和等縣永新安福等所精選民間打手或  
在官機兵共二千名編成隊伍督同知縣陳允諧等  
分統俱赴龍泉縣屯劄該縣鄉夫即日起集守把隘  
口聽候剋期夾剿外今准前因合就咨報為此備由  
移咨前去煩為查照施行

其十七咨報湖廣巡撫右副都御史秦夾攻  
事宜

准巡撫湖廣都御史秦 咨內開夾攻江西該分哨  
道并把截之路及各該官軍不無追剿往來過境必  
須各給旗號識別以防錯誤凡遇賊勢縱橫及攻堅  
去處各領哨官即便發兵策應同舟共濟又稱各省  
窩賊之家今既各有指實必須從長計處絕其禍本  
以收全功煩為參酌行止并將合行事宜咨報以  
憑轉行各該領兵等官遵守等因准此先該本院訪

得大庾南康上猶三縣近附賊巢良民村寨甚多往年大征不曾分別善惡給與良民旗號及撥兵護守以致狼土官兵貪功妄殺玉石不分亦有一二良民村寨給與旗號撥兵護守又被不才領兵官員并良民寨主受賊重賄及將有名賊首隱藏其家事定仍復還巢至今貽患及有吉安府龍泉萬安泰和三縣并南安府所屬大庾等三縣居民無籍者往往攜帶妻女入峯為盜行劫則指引道路征剿則通報消息尤為可惡即今聞有大兵夾攻俱各潛行回家遇有盤詰輒稱被虜迺歸因而得脫誅戮若不通行挨究將來事定仍復入巢地方之患何時可已就預行上猶等三縣着落當該掌印官員查出附近賊巢居民村寨通計若干畫圖申報以憑每寨給與良善旗號臨期撥兵護守仍取各寨主并地方總甲甘結在官如有應剿賊徒來投希圖隱匿者許其擒斬送官照例重賞容隱者事發一寨之人通行坐以奸細重罪其大庾龍泉等六縣各給告示曉諭鄉村里老人等但有平昔入峯為盜即今潛出許其舉首亦行照例給賞容隱事發本家并四鄰一體坐罪如此庶良善免於玉石俱焚而盜賊得以根株悉拔俱經牌仰該

道遵照施行外又據委官知府等官李敦等呈稱依  
奉本院方略分兵於上猶南康等處防遏被賊兩次  
糾衆出攻南安俱幸我兵克捷即今賊勢略已衰敗  
若乘此機會直搗其巢旬月之間可期掃蕩云云本  
院看得三省夾攻事宜集兵有先後期約有遲速如  
上猶大庾之賊江西先與湖廣夾攻止令廣東之兵  
于仁化把截候廣東兵力已齊聽湖廣廣東約會夾  
攻江西之兵止于大庾把截通候廣東湖廣夾攻已  
畢廣東之兵移于惠州江西之兵移于龍南又行約  
會夾攻如此庶先後有序事機不失兵力不竭糧餉  
可省又經移咨貴院查照施行外今准前因看得官  
軍過境必須各給旗號識別以防錯誤攻堅去處必  
須各領哨官即便發兵策應庶得成功持論既極公  
平所處又甚詳悉除行領哨等官遵照施行外惟守  
備指揮李璋所呈窩賊之家傳聞之言未必皆實已  
行該道再行查訪務求的實拔絕禍源其進攻次第  
惟桶岡一處該與湖廣之兵會合若長流坑左溪等  
處皆深入南安府所屬三縣腹心之內見今不次擁  
衆奔衝勢難止遏本院欲將前項賊巢以次相機剿  
撲候貴治之兵齊集會合夾攻桶岡如此則江西腹



心之害已除而二省夾攻之舉得以併力從事擬合  
移咨前去煩為查照定處咨報施行

其十八分委贛州府知府邢珣等統哨

月十

初十日

據守把金坑等處領兵縣丞舒富等申稱探得各峯  
賊首聞知湖廣土兵將到集衆劫掠猖熾日甚鑿山  
開塹為備益堅又聞於桶岡後山陡絕崖壁結構飛  
梯自此直入范陽大山延袤千里自來人迹所不能  
到今皆搬運糧穀設有機隘意在悉力拒戰戰而不  
勝即奔入此中截斷飛梯雖有十萬之衆亦無所施

其力乞要急為區處等因到院隨將各峯擒獲賊徒  
備細研審亦與所呈略同照得先經具題及備行  
兩省將各處賊巢以次攻剿先約湖廣官兵會攻上  
猶諸賊未報但南贛兵力自來疲弱為賊所輕必資  
湖廣土兵然後行事賊見土兵未至必以為夾攻尚  
遠今若出其不意奮兵合擊先以一哨急趨其後奪  
其隘口賊既失勢殆可盡殲若必俟土兵之至果如  
各官所呈陷賊計中老師費財復為他日之患追悔  
何及本院節准兵部咨題奉欽依南贛地方賊情  
着都御史王守仁自行量調官軍設法剿捕及近奉

三陽府志卷八  
平  
敕諭云云俱聽以軍法從事欽此欽遵除監督守巡  
官員行令分投先往上猶大庾等處調度催督外本  
院身督中軍直搗橫水大巢所據各哨官兵合就分  
委督發依期進剿

一仰贛州府知府邢珣統領後開官兵自上猶石  
人坑進由上稍石溪入磨刀坑過白封龍一面分  
兵搜茶潭窩井杞州坑正兵經過朱坑早坑入楊  
梅村攻白藍橫水與都司許清指揮謝昶姚璽知  
縣王天與等兵會合共結為一大營及各選精銳  
用鄉導分引齎乾糧三日四搜附近各山寨如茶

潭窩井杞州坑寨下等處多方爪探務期盡絕互  
相援應毋致踈虞左溪諸賊既盡然後分哨起營  
過背烏坑穿牛角窟踰梅伏坑過長流坑涉果木  
口搜芒背思順過烏地入上新地中新地下新  
地攻桶岡峒諸賊與知府唐淳指揮余恩謝昶等  
兵合勢夾擊賊既敗散遂會各營連絡犄角為一  
大營各選精銳開合縱橫分布搜扒必使噍類無  
遺候有班師期日方許回兵領哨各官及兵快人  
等敢有臨陣退縮違犯號令者仰遵照本院欽奉  
敕諭內事理聽以軍法從事本官務要竭忠効命

三陽府志卷八  
三

益展才猷嚴督諸軍奮勇前進蕩除羣醜以靖地方如或怠忽乖繆致有疎虞 國典具存罪難輕貸本院即日進屯南康親臨督戰一應進止機宜密切差人俱赴營所稟白牌候事完日繳

計開

安遠縣新民義官葉芳曾德禮等名下打手八百名

乾字營哨長趙志標等名下機兵四百名 弓箭手一隊 銃手八名 鄉導二十名

火藥八十斤 地圖一張 軍令八十張 號色

布一千五百件 兵旗大小九十面 令字藍絹

大旗一面 音兵搜扒用為先導尋常皆捲遇各營兵始開 令字黃絹大

旗一面 正兵行動用為先導尋常皆捲遇各營兵始開

軍令

一失誤軍機者斬

一臨陣退縮者斬

一違犯號令者斬

一經過宿歇去處敢有攪擾居民及取人一草一

木者斬

劉營起隊取火作食後時遲慢者照軍法治因

而誤事者斬

一安營住隊常如對敵不許私相往來及輒去衣甲器仗違者照軍法治因而誤事者斬

一凡安營訖非給有各隊信牌及非營門而輒出入者皆斬守門人不舉告者同罪其出營樵牧汲水方便而擅過營門外者杖一百

一軍中呼號奔走驚衆者斬雖遇賊乘暗攻營將士輒呼動者斬軍中卒遇火起除奉軍令救火入外敢有喧呼及擅離本隊者斬

一軍中守夜巡夜之人每夜各有號色號色不應者即便收縛

一軍中不許私議軍機及妄言禍福休咎惑亂衆心違者皆斬

一凡入賊境哨探可往而畏難不往托故推調及回報不實者斬

一軍行遇敵人來衝及有埋伏在傍者不許輒動即便整隊向賊牢札相機殺剿違者斬

一軍行遇賊衆乞降恐有奸謀即要駐軍嚴備一面飛稟中軍令其遠退自縛來投不許輒與相近遇有自稱官吏及地方里老來迎接者亦不

許輒與相近即便駐軍嚴備一面飛稟中軍審  
實發落違者皆斬

一賊使入營及來降之人將士敢與私語及問賊  
中事宜凡漏泄軍情者斬

一凡臨陣對敵一隊失全隊皆斬鄰隊不救鄰隊  
皆斬

一賊敗追奔不得太遠一聽號令聞鼓方進聞金  
即止違者斬

一賊巢財物並聽殺賊已畢差官勘驗給賞敵有  
臨陣擅取者斬

一乘勝逐賊不許爭取首級路有遺下金銀寶物  
不許低頭拾取違者皆斬

一仰統兵官汀州府知府唐淳統領後開官兵前  
往南安府自百步橋浮江合村等處進屯聶都會  
同把隘推官徐文英將點集守把鄉夫於內選取  
堪為鄉導者一百名分引哨路進襲上關破下關  
乃分兵為三哨中一大哨踰相見嶺撲密溪徑攻  
左溪右一小哨從下關分道搜絲茅壩復從中大  
哨於密溪進攻左溪左一小哨自密溪搜羊牯腦  
山復自密溪從中大哨進攻左溪三哨復合為一

與本院會於橫水遂會同守備郊文知府季敷指揮余恩縣丞舒富等兵五營掎角合爲一大營乃各選精銳用鄉導分引齎乾糧二三日四搜山寨多方爪探務期盡絕互相援應毋致踈虞左溪諸賊旣盡聽候本院再授方略然後分哨起營復自密溪回關田推官徐文英仍於關田厚集營陣以待奔竄遺賊勿輕散動本官自關田率兵由古亭進屯上保復自上保歷茶坑由十八磊依期進於木坳攻桶岡諸賊與知府邢珣指揮余恩等兵合勢夾擊賊旣敗散遂會各營連絡掎角爲一大營

各選精銳開合縱橫分布搜扒必使噍類無遺候有班師之日方許回兵領哨各官及兵快人等敢有臨陣退縮違犯號令者仰即遵照本院欽奉敕諭內事理聽以軍法從事本官務要竭忠効命益展才猷嚴督諸軍奮勇前進蕩除羣醜以靖地方如或怠忽乖繆致有踈虞 國典具存罪難輕貸本院即日進屯南康親臨督戰一應進止機宜密切差人俱赴營所稟白牌候事完日繳先具依准及起程日期呈來  
計開

領哨縣丞一員陳秉 上杭縣李福英等名下打

手一千二百名 聶都等寨鄉夫一百名 鄉導

義官一名 銃手四名 弓箭手八名

火藥八十斤 地圖一張 號色布一千五百件

兵旗大小八十四面 令字關防黃布大旗一面

安營 令字藍絹大旗一面 奇兵揜擊用為先導尋常皆捲遇各營兵始開

令字黃絹大旗一面 正兵行動用為先導尋常皆捲遇各營兵始開

一仰南安府知府李敷統領後開官兵自南安府

石人背進破義安分兵搜朱雀坑入西峰分兵搜

狐狸坑進鉛廠分兵搜李家坑屯穩下分兵搜李

坑遂踰狗脚嶺搜陰木坑攻左溪與本院會於橫

水遂與守備邾文知府邢珣唐淳指揮余恩縣丞

舒富等兵合連為一大營乃各選精銳齎乾糧三

日用鄉導分引四搜附近山寨多方爪探務期盡

絕互相接應毋致踈虞左溪諸賊既盡然後分哨

起營過密溪羊搜牯腦踰相見嶺歷上關下關關

田經古亭分屯上保茶坑斷胡蘆洞等處賊路四

面設伏以待桶岡奔賊為都指揮許清之繼探候

緩急相機應援必使根株悉拔噍類無遺候有匪

師期日方許回兵領兵各官及兵快人等敢有臨

陣退縮違犯號令者仰即遵照本院欽奉一敕諭  
內事理聽以軍法從事本官務要竭忠効命益展  
才猷嚴督諸軍奮勇前進蕩除羣醜以靖地方如  
或怠忽乖繆致有疎虞 國典具存罪難輕貸本  
院即日進屯南康親臨督戰一應進止機宜密切  
差人俱赴營所稟白牌候事完日繳先具依往并  
起程日期呈來

計開

巽字營官兵一千二百一十五員名 弓箭手一  
隊二十五名 銃手八名 鄉導二十名

火藥八十斤 地圖一張 軍令八十張 號色

布一千五百件 兵旗大小五十八面 令字關

防黃布大旗一面 建安營 令字藍絹大旗一面 兵司

拚擊用為先導尋常皆捲遇各營兵始開用為先導尋常皆捲遇各營兵始開 令字黃絹大旗一面 正兵行動

一仰江西都司都指揮僉事許清統領後開官兵  
自南康進破雞湖撲新地襲楊梅坑攻白藍與本  
院會於橫水遂與知府邢珣等兵會合共結為一  
大營乃各選精銳用鄉導分引齊乾糧二三日四  
搜附近各山寨多方爪探務期盡絕互相援應毋



致踈虞橫水諸賊既盡聽候本院再授方略然後分哨起營自橫水穿牛窟搜川均陰木潭會左溪入密溪過相見嶺歷下關上關關田上華山過鱗潭屯左泉分斷西山界胡蘆洞等賊路四面設伏以待桶岡奔賊仍歸屯橫水控制諸巢遙與知府季敷相機應援必使根株悉拔噍類無遺候有班師期日方許回兵領哨各官及兵快人等敢有臨陣退縮違犯號令者仰即遵照本院欽奉 敕諭內事理聽以軍法從事本官務要竭忠効命益展才猷嚴督諸軍奮勇前進蕩除羣醜以靖地方如或怠忽乖繆致有踈虞 國典具存罪不輕貸本院即日進屯南康親臨督戰一應進止機宜密切差人俱赴營所稟白牌候事完日繳先具依准及起程日期呈來計開

信豐千戶所千戶林節所統信豐兵夫八百名千戶朱誠所統軍二百五十名 弓箭手一隊二十五名 銃手八名 鄉導二十名  
火藥八十斤 地圖一張 軍令八十張 號色布一千一百件 兵旗大小九十面 令字關防

黃布大旗一面

安營

令字藍絹大旗一面

奇兵

用為先導尋常皆  
卷遇各營兵始開  
先導尋常皆卷  
遇各營兵始開

令字黃絹大旗一面

正兵行  
動用為

一仰守備南贛二府地方以都指揮體統行事指  
揮使邾文統領後開官兵前往南安府自石人坑  
度湯瓶嶺破義安上西峰過鉛廠破苦竹坑剿長  
河洞搜狐狸坑攻左溪與本院會於橫水遂與知  
府唐淳季敦指揮余恩縣丞舒富等兵五營連絡  
為一大營乃各選精銳用鄉導分引齊乾糧二三  
日四搜附近山寨如天台菴獅子山絲茅壩等處

多方瓜探務期盡絕互相援應毋致踈虞左溪附  
近諸賊既盡聽候本院再授方略然後分哨起營  
自左溪過密溪分兵搜絲茅壩會下關入關田過  
古亭踰上保搜茶坑屯於十八磊分兵斷下章設  
伏以待補岡奔賊為知府唐淳之繼使人探候消  
息相機應援必使遠近各賊噍類無遺候有班師  
期日方許回兵領兵各官及兵快人等敢有臨陣  
退縮違犯號令者仰即遵照本院欽奉 敕諭內  
事理聽以軍法從事本官務要竭忠効命益展才  
猷嚴督諸軍奮勇前進蕩除羣醜以靖地方如或

急忽垂繆致有疎虞 國典具存罪難輕貸本院  
即日進屯南康親臨督戰一應進止機宜密切差  
人俱赴營所稟白牌候事完日繳先具依准及起  
程日期呈來

計開

指揮馮翔所統安遠縣義官唐廷華杜栢等名下  
打手四百名 唐克篋等名下弩手二百名 雩  
都縣義官劉秩易元名下兵夫二百名 會昌所  
百戶葛興所統軍二百五十名 弓箭手一隊二  
十五名 銃手八名 鄉導 十名

火藥八十斤 地圖一張 號色布一千三百件

軍令八十張 弓十張 兵旗大小 十面 令

字關防黃布大旗一面 安營 令字藍絹大旗一

面 奇兵揜擊用為先導尋常皆卷遇各營兵始開 令字黃絹大旗一面

正兵行動用為先導尋常皆卷遇各營兵始開

一仰贛州衛指揮余恩統領後開官兵自上猶官  
隘踰獨孤嶺至營前進金坑屯過步破長流坑分  
兵入梅伏坑破牛角窟撲川均陰木潭與正兵合  
攻左溪與本院會於橫水遂與縣丞舒富知府唐  
浮季敦守備邾文等兵連絡為一大營乃各選精

三陽別錄卷八  
三十一  
銃齎乾糧二三日用鄉導分引四搜附近各山寨  
多方爪探務期盡絕互相援應毋致踈虞左溪諸  
賊既盡聽候本院再授方略然後分哨起營過密  
溪搜羊牯腦踰相見嶺歷下關上關關口經華山  
鱗潭網夾裏從左溪入西山界攻桶岡諸賊與知  
府邢珣唐淳指揮謝昶等兵合勢夾擊賊既敗散  
遂會各營連絡掎角爲一大營各選精銳開合縱  
橫分布搜扒必使噍類無遺候有班師期日方許  
回兵領兵各官及兵快人等敢有臨陣退縮違犯  
號令者仰即遵照本院欽奉 敕諭內事理聽以

軍法從事本官務要竭忠効命遵照方略嚴督諸  
軍奮勇前進蕩除羣醜以靖地方如或怠忽垂繆  
致有踈虞 國典具存罪難輕貸本院即日進屯  
南康親臨督戰一應進止機宜密切差人俱赴營  
所稟白牌候事完日繳先具依准及起程日期呈  
來

計開

龍南縣新民王受等謝錢等名下兵一千一百名  
弓箭手一隊二十五名 銃手八名 鄉導二十  
名

人藥八十斤 軍令八十張 地圖一張 號色

布一千三百件 兵旗大小五十八面 令字關

防黃布大旗一面 建安管 令字藍絹大旗一面 奇兵

揜擊用為先導尋常皆捲遇各營兵始開 令字黃絹大旗一面 正兵行動

用為先導尋常皆捲遇各營兵始開

一仰寧都縣知縣王天與督同典史梁儀統領後

開官兵自上猶官隘員坑過琴江口由白面寨至

長潭經木壩屯石玉分兵搜樟木坑正兵自黃泥

坑過大灣入員分與本院會於橫水遂與知府邢

珣都司許清等兵會合四營共結為一大營乃各

選精銳用鄉導分引齊乾嶺二三日四搜附近各

山寨多方爪探務期盡絕互相接應毋致踈虞橫

水等處諸賊既盡聽候本院再授方略然後分哨

起營過背烏坑牛角窟梅伏坑涉長流渡果木口

搜芒背思順入烏地經上新地中新地分屯下

新地分兵搜扒斷絕要路四面設伏以待桶岡奔

賊為知府邢珣之繼使人探候緩急仍與縣丞舒

富聲息相接應接必使唯類無遺候有班師期日

方許回兵領兵各官及兵快人等敢有臨陣退縮

違犯號令者仰即遵照本院欽奉 敕諭內事理

陽明山志卷之八

聽以軍法從事本官務要竭忠効命益展才猷嚴  
督諸軍奮勇前進蕩除羣醜以靖地方如或怠忽  
乖繆致有踈虞 國典具存罪難輕貸本院即日  
進屯南康親臨督戰一應進止機宜密切差人俱  
赴營所稟白牌候事完日繳先具依准及起程日  
期呈來

計開

寧都縣打手一千名 興國縣機兵二百名 弓  
箭手一隊二十五名 銃手八名 鄉導二十名  
火藥八十斤 地圖一張 軍令八十張 號色

布一千二百件 兵旗大小六十面 令字關防

黃布大旗一面

建安營

令字藍絹大旗一面

奇兵

用為先導尋常皆  
捲過各營兵始開  
先導尋常皆捲  
遇各營兵始開

令字黃絹大旗一面

正兵行  
動用為

一仰南康縣縣丞舒富統領後開官兵自上猶營  
前金坑進屯過步破長流坑徑攻左溪與本院會  
於橫水遂與知府邢珣唐淳李敷守備郊文等兵  
合四營共結為一大營乃分選精銳齎乾糧用鄉  
導分引四搜附近賊巢如鰲坑箬坑赤坑觀音山  
庵場仙鶴頭源陂左溪等處諸賊既盡聽候本院

再授方略然後分哨起營復自長流坑過果木口  
搜芒背搜鐵木里狗上池遍搜東桃坑山源竹壩  
泉大王嶺板嶺諸巢遂屯鎖匙龍外四面埋伏以  
待桶岡奔賊仍與知縣王天與聲息相接彼此相  
機應援必使雉類無遺候有班師期日方許回兵  
領兵各官及兵快人等敢有臨陣退縮違犯號令  
者仰即遵照本院欽奉 諭諭內事理聽以軍法  
從事本官務要遵照方略嚴督諸軍奮勇前進蕩  
除羣醜以靖地方如或怠忽忽垂繆致有疎虞定以  
軍法處治本院即日進屯 用康親臨督戰一應進  
止機宜密切差人俱赴營所稟白牌候事完日纔  
先具依准及起程日期呈來

計開

震字營官兵上猶胡述吳明等二百名 南康王  
鎮定賴養价等二百名 北鄉劉叔斐鍾閏珠譚  
喬植等三百名 石塘拏手嚴均顯等五十名  
金坑思順過步兵一百名 白面廖惟道等兵一  
百名 童子里父子兵一百名 賴振祿等兵一  
百五十名 上猶打手李欽等一百名 信豐縣  
楊璿等一百名 弓箭手一隊二十五名 銃手

八名 鄉導二十名

火藥八十斤 地圖一張 軍令八十張 號色

布一千五百件 兵旗大小八十面 令字關防

黃布大旗一面 建安營 令字藍絹大旗一面 奇兵

用為先導尋常皆 令字黃絹大旗一面 正兵行

遇各營兵始開 一仰吉安府知府伍文定統領後開官兵前去屯

劄穩下會同守備郊文併謀協刀搜剿稽蕪等處

賊巢進屯橫水聽候本院再授方略然後進攻桶

岡諸峒本官仍須詳察地里險易相度機宜協和

行事毋得爾先我後力散勢分致失事機 國典

具存罪不輕貸其領哨各官及兵快人等敢有臨

陣退縮違犯號令者許即以軍法從事軍中一應

事宜亦聽隨宜應變應呈報者仍呈軍門施行俱

毋違錯具依准隨牌繳來

計開

廬陵等縣官兵三千員名 鄉導二名 軍令八

十張 地圖一張 令字關防黃絹大旗一面 建安

奇兵 令字藍絹大旗一面 奇兵 令字黃絹大旗一面 正兵

常皆 令字黃絹大旗一面 常皆 令字藍絹大旗一面 常皆

遇各營兵始開 令字黃絹大旗一面 遇各營兵始開

遇各營兵始開



一仰廣東潮州府程鄉縣知縣張戩統領部下新民打手鄉夫人等搜剿稽蕪黃雀坳新地等處賊巢進屯橫水聽候本院再授方略然後進攻桶岡諸峒本官仍須詳察地里險易相度機宜慎重行事毋失事機 國典具存罪不輕貸其兵快人等敢有臨陣退縮違犯號令者許照本院欽奉 敕諭內事理即以軍法從事軍中一應事宜亦聽隨宜應變應呈報者仍呈軍門施行俱毋違錯牌具依往繳來  
計開

程鄉縣新民打手鄉夫一千六百六十三名 鄉

導二名 軍令八十張 地圖一張 兵旗大小

五十六面 號色布一千七百件 令字關防黃

布大旗一面 建安營 令字藍絹大旗一面 奇兵揜

先導尋常皆捲 令字黃絹大旗一面 正兵行動

遇各營兵始開 尋常皆捲遇 各營兵始開

一仰中軍營參隨官

其十九案行摧督各哨官兵 十月初十日

案照先經行仰該道守巡官分投先往上猶大庾等處住劄聽候各哨官兵至日即便催督進剿去後今

照領兵官等官已該本院坐委合行分投催督爲此  
仰抄案回道即便催督各哨官兵遵照方略依期星  
夜直抵巢穴務將前賊掃蕩撲滅以靖地方毋遺芽  
蘖致貽後患本道仍行各官詳察地里險易相度機  
宜慎重行事毋得輕率寡謀及逗遛退縮致誤事機  
定以軍法從事軍中未盡事宜亦聽隨機應變施行  
仍呈本院知會俱毋違錯

其二十案行分守嶺北道官兵戴罪剿賊

十月二  
十一日

據叅議黃宏呈指揮郊文知府李敷呈稱訪得朱雀

等坑峯賊俱屯稽蕪大山絕頂於十月十一日責令  
鄉導指引前進柰賊據險飛石流矢殺傷異字營千  
戶劉彪及打傷坎字營義官唐克箠等兵夫五十餘  
人兩哨官兵冒險勇進異字營殺死賊徒割取耳四  
隻小功三箇坎字營斬首一級奪獲牛三隻及將賊  
巢米穀盡行燒燬緣由備呈到院叅看稽蕪大山不  
係進兵隘路若使郁文季敷等遵依本院方略直趨  
左溪與諸軍連營合勢兵威旣振然後分兵四剿則  
稽蕪等巢自然聞風而靡今乃不遵約束頓兵僻路  
以攻險絕堅小之寇反致損威挫銳非但有乖節制

抑且違誤師期若使各哨官兵皆若季敷等後期不  
進則左溪橫水賊巢根本腹心之地何由攻破諸軍  
何由得有今日之勝論情定罪俱合處以軍法但今  
各營皆已乘勝追逐賊徒四散奔潰正係緊關搜截  
之際姑令戴罪剿絕以贖前辜爲此仰抄案回道速  
督各官分投把截搜剿俱要勵志奮勇毋徒退縮以  
自全毋以小挫而自餒務奮澠池之翼以收桑榆之  
功如復仍前畏縮違誤軍令具存難再容恕仍將陣  
亡千戶劉彪及被傷兵夫人等查驗紀錄量加優恤  
其二十一牌行統兵官協謀搜剿

據參議云云爲此牌仰指揮郝文等仍屯穩下督同  
指揮馮翔分領兵快與知府伍文定協謀合力搜剿  
稽蕪等賊知府季敷退屯義安分兵守把沙村等隘  
遙與聶都守隘推官徐文英聲勢相應務遏諸賊南  
奔要路相機搜剿各官俱要勵志奮勇毋徒退縮以  
自全毋以小挫而自餒務奮澠池之翼以收桑榆之  
功如復仍前畏縮違誤軍令具存難再輕貸

其二十二咨湖廣巡撫右副都御史秦剋期

會剿

十一月二日

准巡撫湖廣都御史秦咨議照會剿事情已該兵部

議奉 欽依剋期於九月中進兵職等督理兵糧粗  
有次第近因楊總兵病故又為兩廣地遠約會頗難  
只得改期十一月初旬衡州取齊聽候分哨會兵具  
題及差官約會進剿即今所調漢土官兵不旬日間  
俱集若令住劄候至閏十二月方行會剿非惟糧餉  
不敷亦恐地方騷擾况賊情狡詐必致乘虛奔逸除  
移文兩廣總鎮軍門查照作急會議一面嚴督布守  
官兵謹把賊路防其奔逸一面督發兵糧委官分哨  
相機策應剿殺外備咨貴職查照事理至期督發各  
哨夾剿仍希由咨報等因案照先為緊急軍務事本  
職看得進攻次第江西惟桶岡一處該與湖廣之兵  
會合其餘左溪橫水等處皆深入南安府所屬三縣  
腹心之內見今不次擁眾奔衝勢難止遏欲將前項  
賊巢以次相機剿撲候貴治之兵齊集夾攻桶岡又  
經移咨貴職外續據縣丞舒富等呈稱各輦賊首聞  
知湖廣王兵將到欲奔桶岡集眾拒戰戰而不勝奔  
入范陽大山乞急為區處等因到院隨將領兵知府  
邢珣等指授方略剋期於十月十二日子時發兵進  
剿本院即日進屯親臨南康督戰遂破橫水左溪等  
巢但賊首未獲方行各哨追襲今准前因照得江西

兵糧粗已齊集及照十一月初一日之期亦已不遠  
除行兵備等官監督各哨一面分投追襲未獲賊徒  
一面行令務在十一月初一日移兵徑趨桶岡等處  
分布夾攻不許後期誤事及行兵備副使楊璋移文  
叅將史春知會外為此合咨前去煩請貴院查照早  
為督發切勿後時實為地方之幸

其二十三案行江西嶺北道剋期會剿  
仰抄案回道會同分守官一面監督各哨兵馬即將  
未獲賊徒行令務在十一月初一日移兵江西嶺北  
等處分布夾攻一面備行湖廣叅將史春遵照原行

進兵夾剿不得後期誤事倘致叅錯責有所歸

其二十四牌行分守巡嶺北道搜滅餘黨

十月二  
十三日

照得本院於本月十二日親督諸軍進破橫水等巢  
諸軍皆奮勇敢死奪險陷陣賊乃大敗擒斬功次數  
多良已可嘉但聞餘黨徃徃復相嘯聚千百為羣設  
柵阻險復為抗拒官兵之備所據各兵進攻之日攀  
崖緣壁下上險阻疲困已極兼之陰雨連日瘴霧咫  
尺不辯故且容令各兵暫爾休息今天氣漸開兵力  
已蘇若不乘此破竹之勢疾速急擊使諸賊聲勢復

得連絡用力益難為此牌仰該道官吏嚴督各營官  
兵星夜疾進務在三日之內掃蕩餘孽必使噍類無  
遺敢有徇於一勝怠忽因循逗遛不進致誤軍機者  
仰卽遵照 敕諭事理當時以軍法從事該道亦要  
身督各官奮勇前進毋虧一篲務在萬全

其二十五牌行典史梁儀千戶林節立營防

守

十月二  
十七日

照得本院親督軍進破橫水等巢賊徒已就誅戮但  
山高林密誠恐漏殄之徒大軍撤後仍復嘯聚必須  
建立營場委官防守為此牌仰典史梁儀協同千戶

林節統領寧都機兵四百名信豐機兵六百名就在  
水大村破伐木植相視地勢雄阜去處建立營場一  
所周圍先豎木柵逐旋修築土城聽候本院回軍住  
劄以憑委官留兵防守各官務要同心協謀精勤幹  
理工完之日照依軍功論賞所領兵衆如有不聽約  
束許以軍令責治其合用匠作等項聽於南安所屬  
上猶南康等縣取用該縣俱要即將應付毋得遲違  
誤事

其二十六獎勵湖廣統兵叅將史春牌

四

十  
月初

據副使楊璋呈稱遵奉本院牌案監督各營官兵照依二省刻定日期於十一月初一日午時攻破桶岡大峒賊徒皆已擒斬巢穴悉已掃蕩但湖廣官兵未知恐仍復前來非但無賊可剿抑且徒勞遠涉乞將湖廣官兵留屯彼地免其過境實為彼此兩便等因到院看得桶岡天險先經夾剿圍困半年終不能下乃今一鼓而破斯固諸將用命軍士效力實亦湖廣兵威大振有以懾服其心故破巢之日不敢四散奔潰以克收茲全功訪得湖廣統兵叅將史春紀律嚴明行陣肅整故能遠揚威武致茲克捷雖兵不接刃而先聲以張相應差官獎勵為此牌差千戶高睿齎領後開花紅禮物前去湖廣郴州親送本官營內佈布本院獎勵之意以彰本官不顯之功

其二十七咨湖廣巡撫右副都御史秦摘兵

搜扒 十一月十一日

據知府邢珣唐淳會呈各職近奉本院調發於本年十一月初一日依湖廣剋期夾攻桶岡峒諸巢遵依攻破茶寮等處擒斬賊黨已盡見今各兵四散搜扒無賊可捕訪得官兵未進之先各賊帶領家屬逃往桂東縣連界大山藏頴及將捕獲賊人黃順等備細

研審相同但今彼處官兵未見前來若不移文催督誠恐先遁各賊乘虛在彼奔竄各營官兵難於過境搜扒呈乞照詳等因到院卷查先為前事已經通行湖廣江西廣東三省該道兵備守巡等官調集官軍把截夾攻及嚴督府衛所州縣等官起集兵快鄉夫各於賊行要路晝夜把截若賊奔遁就便相機擒捕去後今據照得桶岡賊徒陸續潛逃所據守隘等官未暇參究但今各賊又在彼藏蘊若不速行搜扒將來大兵既撤諸賊必將復歸桶岡重貽後患為此合咨貴院煩將原調官兵量撥三四千前來桂東連界大山逐一搜扒必使果無噍類然後班師庶幾一勞永逸而彼此兩無遺憾及請戒令各官止於連界大山搜扒不得過境深入尤為地方之幸

其二十八案行湖廣郴桂兵備摘兵搜扒

據知府邢珣云云為此仰抄案回道備呈撫鎮等衙門查照施行一面轉行統兵叅將史春將原調官兵內摘撥三四千人前來桂東連界大山內逐一搜扒必使各山果無噍類然後班師仍嚴飭前項官兵止於連界大山搜扒不得過境深入重為地方之患毋得違誤



其二十九犒賞湖廣官兵

十一月十五日

據湖廣兵備副使陳璧差舍人王廷璽稟稱該省土兵已於本月十一日俱至桂東隨據湖廣守備武岡指揮王翰呈稱剋期於十一月十三日進剿等因叅看得湖廣官兵既已約定十一月初一日進剿自合依期速進今本省官兵攻破桶岡已將半月始聞各兵前來揆之初約實已後期但念各兵千里遠涉亦已勞頓若能悉力搜剿尚有可冀之功且宜略棄小過先行犒勞及照郴桂地方原係本院所屬相應差官押束為此除差贛州衛指揮同知明德齋執令旗令牌前往監押外牌仰郴州兵備道官吏即將發去牛酒照數查給用見本院慰恤犒勞之意各官務要嚴飭兵衆遵照該省巡撫軍門及本院號令約束各於當境界內藏賊山坳去處搜扒務使地方解倒懸之苦百姓有安堵之休共勸忠貞之節以收廓清之功如或參錯乖繆致有踈虞 國典具存决不輕貸仍取犒賞過緣由并各土兵頭目人等姓名數目各具依准隨牌繳來

其三十牌行監軍巡守官分屯把截

十一月十一日

五

訪得桶岡峒殘賊見今俱逃上章山內若湖廣官兵  
從彼四路井入其勢必復遁回所據賊奔要路惟茶  
寮茶坑竹瓦窰等處最當兵鋒除本院親率帳下見  
屯茶寮分遣守備指揮郝文督同指揮謝昶馮廷瑞  
等屯新地知府唐淳屯霹靂坑知府邢珣屯胡蘆洞  
知縣張戩屯竹瓦窰縣丞舒富屯茶坑知府伍文定  
屯大水小水知府季敦屯聶都各人嚴加把截相機  
行事外其茶坑竹瓦窰等處合遣方面重臣往彼監  
督庶使兵威振揚土兵不致生事為此牌仰兵備副  
使楊璋分守叅議黃宏即便前去地名茶坑聶都等  
處監督各項官兵務要設奇埋伏以邀奔賊仍令厚  
集營陣振揚兵威以待湖廣土兵止令於連界賊遁  
各山搜扒不得過境深入重為民患毋得違誤致有  
踈虞 國典具存罪亦難逭

其三十一 犒恤統兵土舍

十一月二日

據兵備副使陳璧呈稱會同指揮王翰知府何詔遵  
將指揮明德齋到犒賞牛酒銀兩眼同給受當即申  
明軍門號令嚴督本哨漢土官民軍兵在于本省界  
內山箐深密巖寨去後設法搜扒期在盡絕及禁束  
不許一兵一卒越過江西境界并將本哨原領兩江

口土兵頭目人等姓名開報到院看得前項土兵頭目人等赴夾攻之期雖亦稍遲涉艱險之路則已甚遠宜錄勤勞量行犒恤為此牌仰榔桂兵備道官吏即便公同差去指揮明德將本院發去牛酒銀兩查照後開數目逐名分給用宣本院慰勞之意以勉各役報效之忠仍各嚴加戒飭務於本省界內賊遁大山搜括不得過境侵擾良民獲有多功重賞不吝苟違節制軍法具存備開給賞過緣由繳牌

其三十二牌行統兵知府伍文定把截奔賊

撫處降民

十一月二十五日

照得湖廣官兵見今攻剿朱廣魚菁等處賊必束奔聶都地方正當衝要先該本院行委知府李敷分兵把截近因本官稟稱朱雀等坑峯人何文秀等俱各告招已經行令從宜處置勢難輕動兼且賊奔要路非止聶都一處必須委官協把又據白長朱文清稟稱新溪等巢告招峯人劉汝貴等三十二名自願隨兵殺賊立功亦合委官撫處為此牌仰知府伍文定分兵前往聶都等處督同推官徐文英嚴加把截相機擒捕一面拘集朱文清等鄉兵先將投招劉汝貴等從宜處置督令殺賊立功或將老幼婦女責令附

八陽明別錄卷八  
近村寨領養免致土兵人等殺害候獲有功次通行  
開具花名一併解赴軍門以憑議處安插承委官員  
務要周悉詳慎區畫停當毋致疎虞

其三十三牌行江西袁州府提問失期官員

十二月  
初九日

據袁州府萍鄉縣申稱知縣高桂到任兩月查追各  
年未完錢糧清理軍伍又稱城垣倒塌修補未完等  
項緣由申報到院卷查前事已經調取高桂等前來  
軍門領兵殺賊隨准兵部咨奏奉 欽依各官之中  
敢有抗違者即以軍法從事又經通行催取去後今

據前因參看得知縣高桂既奉明文調取殺賊自合  
依期星夜前赴軍門聽用為當乃敢故違軍令繁文  
抵搪且本院於七月行縣調取抗違兩月之上不行  
前來至十月初一日本院親督各哨進剿輦賊本官  
已是違期却至本月十六日方纔具申遮飾若使調  
用各官俱若高桂傲慢違抗豈不有誤軍機合就處  
以軍法但今師已克捷姑從輕提問以警將來為此  
牌仰本府官吏即便行提犯人高桂正身到官問擬  
應得罪名具招申報發落毋得容延取罪不便

其三十四犒賞統兵致仕宣慰彭世麒

二十

月十六日

據哨探指揮明德報稱湖廣廣東魚皇洛平石等處賊巢悉破地方已寧等因照得統兵致仕宣慰彭世驥素稱儒雅久著勲勞養高林下猶深報國之誠同苦行間復建平徭之績合行犒獎以勵忠勤為此今差舍人任光領齋後項禮物前去本官處親行犒勞用見嘉樂之意仍仰本官益敦鄒魯詩書之習以為湖湘忠義之倡惟為善之不替庶永譽以無窮

其三十五批廣東嶺南道調摘兵壯呈

十閏

二月二十二日

據兵備僉事王大用呈看得三省會剿調摘各處兵壯蓋亦事不容已若使該縣官吏果能先事為備多方設法在城在鄉俱行起集排門父子兵夫操演振揚威聲盜賊聞風自然不敢輕犯今乃無事則袖手坐視及至賊已入境搶掠方纔選兵此亦何能有濟所據各該官吏俱合拏問但既稱正在用人之際姑記其罪仰該道急與查處仍行鄰道及附近府縣一體多方設法嚴謹督捕務期剿獲以贖前罪如再因循怠慢徒以兵少為辭致有疎虞定行從重拏究不恕呈繳

其三十六案行嶺北道慶賀湖廣鎮巡司等

官

閏十二月二十九日

照得湖廣郴桂等處所轄峯賊連年糾合廣東江西賊衆劫掠鄉村攻打縣堡遠近荼毒神人痛憤近因奏奉 欽依三省合兵征剿三月之內巢穴掃蕩賊黨盡擒共收克捷之功用樹安攘之績是皆湖廣巡撫監軍懷遠略而行之以慎密出奇謀而鎮之以安靜及各守巡兵備等官同心協力竭忠奮勇之所致自此各省人民悉解倒懸之苦偕享衽席之安推功仰德禮宜行慶爲此仰抄案回道即於賞功所動支後開銀花綵段禮物差官領齎前去湖廣送赴 欽差巡撫都御史秦鎮守太監杜及巡按紀功監察御史王并方布政憚副使等官少將本省慶賀之意以見同舟共濟之情

其三十七案行嶺北道設立茶寮隘所

照得撫屬上猶等縣所轄桶岡天險四面青壁萬仞中盤二百餘里連峰參天深林絕谷不睹日月賊衆屯據其間東出西沒遊劫殆遍人民遭其荼毒地方受其擾害先年亦嘗用兵夾剿坐困數月不能俘其一卒竟以招撫爲名而罷近該本院奉 命征剿仗

賴 天威悉已掃蕩但恐官兵撤後四方流賊乘間復聚必須於緊關去處設立隘所分撥軍兵委官防禦庶使地方得以永寧本院見屯茶寮親督知府邢珣唐淳等徧歷各處險要相視得茶寮正當桶岡之中自來盜賊據以為險西通桂東桂陽南連仁化樂昌北接龍泉永新東入萬安興國堪以設隘保障當因湖廣官兵未至各營屯兵坐候因以其暇責委千戶孟俊等督領兵夫先行開填基址伐木立柵起蓋營房見今規模草創已具本院即欲移營上猶必須委官督工庶幾垂成之功不致廢弛及照茶寮既設隘所就合摘撥官兵防禦查得皮袍洞隘兵原非緊要合改移茶寮及於鄰近上保古亭赤水鮮潭金坑編選隘夫兼同防守庶一勞永逸事可經久為此仰抄案回道坐委能幹縣官一員前去茶寮督工完造務要堅固永久不得因循遲延一面查照本院欽奉敕諭隨宜處置事理即將原撥守把皮袍洞隘官兵盡數移就茶寮住劄一面於上保赤水古亭鮮潭金坑等寨量丁多寡每寨抽選精壯者一二百名兼同防禦其合用匠作工食等項行令上猶南康大庾三縣量支官錢給用完日具數及起撥官兵數目一併

回報查考仍呈撫鎮巡按衙門知會

其三十八批嶺北道新設縣治事宜呈

據副使楊璋備將橫水事宜開款呈詳一大兵撤後餘孽不無再集查得縣丞舒富才頗有為擒賊功多合無將上猶大庾龍泉三縣機兵打手鄉兵各點集一千名專委統領于新立縣所住劄將已破賊巢不時巡視如有餘黨復集即便擒拏

看得橫水雖建縣治工未易就近照本院議於桶岡橫水兩處先立隘所行仰該道將附近虛設隘夫及各村寨并通賊人戶悉行查編隘夫各一千餘名計

亦足以防剿餘賊若復於三縣各點機快千名不無糧餉費多但欲委官往來巡視亦須用兵防護每縣止點三百名分作三班跟隨委官舒富於橫水桶岡等處巡視遇有殘黨肅聚即便兼督隘夫剿撲有功照例陞賞機兵行糧在於各縣所餘餉內支給每人各一升候縣治已建地方寧謐再行呈處

一建立縣治雖候命下而土木興造必須委任得人查得南安府推官徐文英在任年久幹事勤能合無三縣各撥人夫三百名專委本官總督採辦木植燒造磚瓦會計城池衙門與夫工力匠作逐一計處



呈詳

看得地方兵困之餘量宜寬恤而推官徐文英亦有公務相妨查得橫水見編隘夫一千餘名今盜賊新平各夫未有追襲之役合將三縣人夫分作三班委官統領每縣輪班兩月就委縣丞舒富不妨往來巡邏兼督一應採辦木植燒造磚瓦等役就令本隘各夫相兼並作况本官又有跟隨機快三百名無事之時亦可通融役使如此則民不重困事亦易集

一二府舊俗田地白不耕種皆佃與龍泉泰和萬安等縣流移人戶至于盜賊之興前項之人指引出劫合夥分賊害不可言者合無痛加禁約如田多人少者止許佃與本地之人如違田主佃戶一體坐罪發遣

看得所議深切時弊實乃弭盜之源仰即出給告示嚴加禁絕今後但有異府各縣之人潛住本處村寨佃種者即係奸細之徒但有容留潛將田土佃種者即係窩藏流賊奸細之人體訪得出或被入告發即便擒拏到官斷治如律

一新設縣治界乎三縣之中道路俱被輦人鑿峻往來甚阻合無三縣各委官帶人夫百名石工數名將

前項道路開通仍於適均去處先建公館一所及鋪舍各一座庶車馬流通盜無所容

看得所議委官起夫漸次開通就委縣丞舒富兼督候道路既平即將各夫解放其設立公館鋪舍等項悉照詳施行

一新設縣治三縣該剖圖分累年被賊搔擾占據錢糧皆其包納其餘人民俱以兵馬之擾搬運之勞困苦已極况今添設縣治未免仍于三縣取辦合無將三縣正德十二年該剖圖分連正德十三年稅糧差役盡行蠲免候十四年一體納糧管差

看得所建縣治未經奏准各縣錢糧縱復奏蠲恐未允免除合用人夫量行撥起外其餘不急事務該道悉行查革以甦民困蠲免錢糧候設縣之後另行議奏

一縣治既設學校當先合行提學副使將三縣之中見在增廣考其尤者撥于新縣以充廩膳起送民間俊秀以充增附

看得議選生徒良亦先務然亦須兼存填實之意仰先行提督學校官於三學之內但有願於新設縣治起蓋房屋占籍移居者即便聽撥新學仍於其中略

考文藝以充廩膳增附之數如此則既庶既富而學校之教可興矣

其二十九牌行招撫官縣丞舒富

正德十三年二

八月初

據縣丞舒富稟稱橫水等處新民廖成廖滿廖斌等前來投招隨又招出別山餘黨唐貴安等一百四十二名口俱稱原係被脅無辜乞要安插照例糧差等因到院照得橫水桶岡諸賊已經本院親調官兵將賊首藍天鳳等悉已擒剿奏捷去後近准兵部咨奏奉 敕旨橫水桶岡等處賊首謝志山藍天鳳蕭貴

模等既已擒剿地方寧靖有功官兵俱陞一級不願陞者照例給賞此後但有未盡餘黨務要曲加招撫毋得再行剿戮有傷天地之和其橫水建立縣治俱依所奏施行備咨准此除查照通行外看得新民廖成等誠心投撫意已可嘉又能招出餘黨非但洗其既往之罪亦當錄其圖新之功况今奉有 敕旨方欲大普弘仁而廖成等投順適當其時相應量加陞賞一以見 朝廷之寬仁一以勵將來之向化為此牌仰縣丞舒富即將新民廖周授以領哨義官廖滿廖斌等各與巡捕老人名目令其分統招出新民編

立牌甲聽候調遣殺賊更立新効以贖舊愆就於橫  
水新建縣城內立屋居住分撥田土令其照例納糧  
當差本官務加撫恤毋令失所有虧信義仍仰諭各  
新民俱要洗心滌慮永爲良善毋得聽信讐家恐嚇  
妄生驚疑自取罪累及照見今農時已過新民人等  
牛具田種當未能備今特發去商稅銀一百兩就仰  
本官置買耕牛農器分給各民督令上緊趁時布種  
其有見缺食用者亦與量給鹽米一應撫安綏來之  
策有可施行俱仰本官悉心議處呈來

其四十牌行南安府撫緝新民

二月初  
八日

據縣丞舒富稟招撫過新民二百餘徒乞於橫水思  
順等處安插已經行仰照議施行外看得招來新民  
安插漸多恐有貪功譎詐之徒潛去激誘生變致亂  
大謀合先禁約爲此牌仰知府季敦將該府招出新  
民自行時加撫緝毋令得與外人交接致有驚疑其  
思順橫水等處尤要嚴禁所屬一應官兵人等不得  
輒徃問訊傳遞消息造作語言惟當專責縣丞舒富  
悉心經理一應事機俱聽從宜區處敢有假以公差  
報効等項名色擅去新民安插地方有所規圖者定  
行拏赴軍門治以軍法該府行遵照施行

其四十一 獎勞廣東兵備等官

七月初六日

據廣東兵備僉事王大用等會呈督領官兵前後擒斬賊犯高快馬李斌等共一千四百餘名顆及據嶺東道僉事顧應祥等呈督領官軍前後俘斬賊犯吳珮等一千一百七十餘名顆口到院為照僉事王大用顧應祥等備効勤勞懋收克捷可謂克稱委任不負所學都指揮王英歐儒及知府姚鵬同知阮仲義通判鄒級莫相知縣李增李萼或領兵督哨或進剿防截類皆身親行陣且歷險難俱各獎勞以表勤能為此仰抄案回府即便查照後開獎勞數目動支商

稅銀兩差人分送各官用見本院嘉獎之意以明師旅激揚之典

其四十二 批廣東統兵都指揮等官留兵搜

捕呈

七月十九日

據統兵官王英等呈開各哨擒斬賊首龔福全高快馬李斌藍友常等首從賊犯及俘獲賊屬奪回被虜男婦牛馬器仗等項除將獲過功次查造及督知府姚鵬等率兵緝探撫處看得樂昌等處賊徒構禍連年流毒三省今兵備僉事王大用等乃能身歷險阻設謀調度數月之內致此克平論厥功勞良可嘉尚

除具本 奏報及一面先行犒獎外所據各哨賊徒  
穴巢雖已底定而漏殄難保必無况聞湖兵撤後各  
該巢穴多復嘯聚河源龍川諸處殘賊亦復招羣集  
黨連結漸多逆其將來必復熾盛今雖役久兵疲且  
宜班師息衆但留兵搜捕亦不可苟毋謂斬木之不  
藁死灰之不然苟涓涓之不塞將江河之莫禦其狼  
兵既已罷散難復追留若機快鄉兵之屬暫令歸休  
即可起集為輪耆迭出之計務使搜剿之兵若農夫  
之耘耨庶幾盜賊之種如萑莠之可除該道仍備行  
搜捕各官務體此意悉拔根苗無遺後患批呈繳

其四十三批廣東嶺南道將士爭功呈

十一日

月十

據兵備僉事王大用呈樂昌縣知縣李增緝獲大賊  
首李斌等審驗明白續據湖廣永州府推官王瑞之  
呈稱廣東差人邀奪等情已拘知縣見在人役追出  
原得獲李斌金簪銀兩荷包見在顯是湖廣兵快計  
擒不得妄報掩飾看得邇者大征之舉湖廣實首其  
謀江廣亦協其力既名夾攻事同一體湖兵有失是  
亦廣兵之罪廣人有獲斯亦湖人之功况今賊首既  
擒則湖廣領哨之官亦復何咎雖云因虞得鹿而廣

東計誘之人亦非無功但求共成厥事何必已專其  
伐矧各呈詞亦無相遠就如湖廣各官所呈即廣人  
乘機捕獲之功居然自見就如廣東各官所呈則湖  
官運謀驅逐之勞亦自不掩獲級者匹夫之所能爭  
功者君子之大耻仰該道備行湖廣守巡等官彼此  
同心易氣各自據實造冊

其四十四 欽奉陞廕 敕諭通行各屬

七月初一日

六月二十九日節該 欽奉 敕諭爾奏上猶等縣  
桶岡橫水左溪等巢賊首藍天鳳謝志山等盤據險

阻荼毒數郡僭擬王號圖謀不軌基禍種惡已非一  
日今幸奉行成筭督同兵備分守等官調集官兵分  
哨並進擒斬首惡并從賊三千二百五十四名顆俘  
獲賊屬男婦二千三百三十六名口奪獲被虜人口  
及頭畜賊仗數多渠魁皆已授首黨惡亦無遺類等  
因朕惟蠢茲盜賊恃險聚衆稔惡歲久雖嘗設法招  
撫愈肆桀驁及用兵攻剿又未見成功乃今僅兩月  
之間克殄此數十年未熄之患自非爾運籌定議親  
臨巢穴申嚴號令調度有方何以致此捷奏來聞朕  
心嘉悅除有功官員人等命該部查議陞賞外茲特

陽明先生別錄卷之八  
陞爾前職廕一子為錦衣衛世襲百戶仍降敕獎勵  
以旌爾勞尚念盜賊甫平居民未盡安堵爾尤宜竭  
心殫慮從宜撫處以靖地方務使黔黎樂業永保無  
虞庶不負朝廷委任至意欽此欽遵擬合通行為此  
仰抄案回司道着落當該官吏照依案驗備奉 敕  
諭內事理并行各道守巡兵備等官轉行府衛所州  
縣等衙門一體欽遵施行

陽明先生別錄卷之八



